

Lia Rumantscha beneventa la decisiun

■ La Lia Rumantscha beneventa la decisiun da la regenza davart il Plan d'instrucziun 21 per il rom rumantsch sco lingua da scola. Las scolas pon vegnir manadas vinavant en ils idioms u en rumantsch grischun. Da nov s'occupan sin il stgalim superiur tut las scolaras ed ils scolars da la lingua da standard. Cun questa decisiun è la regenza suandada la proposta da la Lia Rumantscha.

Ils 24 da november 2015 ha la regenza grischuna relaschà il plan d'instrucziun per il rom rumantsch sco lingua da scola sco era singulas parts dals plans d'instrucziun da lingua. Tenor la communicaziun da la regenza vegn il plan d'instrucziun per il rom rumantsch sco lingua da scola mess en vigur il medem mument sco l'entir Plan d'instrucziun 21 Grischun probablamain per l'onn da scola 2018/19.

Ina decisiun directiva

Cun questa decisiun directiva termine-scha la regenza grischuna ina malsegirezza che exista dapi intgins onns davart il futur dal rumantsch grischun en scola. Ella resguarda tut ils puncts central da la proposta davart il tractament dal rumantsch en il Plan d'instrucziun 21 che la Lia Rumantscha aveva elavurà per incumbensa dal chantun Grischun. Il Plan d'instrucziun 21 per il rumantsch tracta a moda eguala las scolas che instrueschan en ils idioms e quellas che alfabetiseschan en rumantsch grischun e porscha a tuts dus models la pussaivladad da duvrar lur lingua d'alfabetisaziun davent da l'emprima classa enfin la fin dal temp da scola obligatoric. La decisiun po servir sco basa per elavurar meds didactics per l'instrucziun da lingua en ils idioms.

Avischinaziun u competenzas

En il Plan d'instrucziun 21 per il rom rumantsch sa refereschan tut las competen-



Mieds didactics rumantschs en sis variantas.

FOTO M. HARTMANN

zas sin tut ils stgalims a la lingua d'alfabetisaziun. La Lia Rumantscha beneventa quest princip che ha la finamira da tractar egualmain las scolas manadas en l'idiom resp. en rumantsch grischun. Ils aderents dal rumantsch grischun avessan giavischà competenzas liantas per la lingua da standard en il Plan d'instrucziun 21. Quai avess manà tenor l'opiniun da la Lia Rumantscha ad in tractament inegual da las scolas idiomaticas, cunquai che las scolaras ed ils scolars avessan gi da far examens en duas furmas rumantschas scrittas (idiom e rumantsch grischun). Il plan d'instrucziun prevesa dentant en l'avegnir in'avischinaziun al rumantsch grischun per las scolas manadas en ils idioms, la quala è francada en il plan d'instrucziun sco uschenumnada pretensiun da basa: en il terz ciclus (stgalim superiur) legian e taidlan las scolaras ed ils scolars da las scolas idiomaticas en il senn d'ina avischinaziun singuls texts en ru-

mentsch grischun. La Lia Rumantscha è persvasa che las enconuschientschas dal rumantsch grischun sco lingua da punt promovon la chapientscha tranter las gruppas linguisticas idiomaticas.

Da nov: rumantsch grischun en tut las scolas

La pli gronda novaziun per la scola rumantscha en connex cun l'entrada en vigur dal Plan d'instrucziun 21 è che tut las scolaras ed ils scolars vegnan en contact cun il rumantsch grischun sin il stgalim superiur ed emprendan da chapir la lingua da standard. Per las scolas che vegnan manadas en rumantsch grischun na sa mida nagut. Per las scolas manadas en ils idioms è questa avischinaziun sistematica al rumantsch grischun percenter nova. Quai tegna quint dal fatg ch'il rumantsch grischun è dapi il 1996 la lingua uffiziala dal chantun Grischun e da la confederaziun.

Lia Rumantscha